

112學年度中山女高語文競賽客家語朗讀文（四縣腔）

編號1號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个偈攞手；難得个放寮日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔寮；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田浮出來哩；風吹來，該一陣一陣歡喜到手攞腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嬬下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過蒔二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項搵手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆跔在屋面前个菜園摘菜，菜園分屋仔蔭等、日頭還㗎會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿俵仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醺，靚靚个日頭、靚靚个心情，這就係簡單个幸福。

¹ 手攞腳踏：音 su\ngiong\ giog\ tab；手、腳舞動跳躍。形容非常高興喜悅的樣子。